




Broj: 01- 178 /11

Datum: 23. novembar 2011. godine

BOSNA I HERCEGOVINA
PARLAMENTARNA SKUPŠTINA
PREDSTAVNIČKI DOM
TRG BiH 1
SARAJEVO



PREDMET : Poslanička pitanja, odgovori, dostavljaju se

VEZA: Vaš akt broj 01/a-50-1-15-12/11 od 01.11.2011. godine

Poštovani,

aktom broj i datum veze dostavili ste nam poslanička pitanja, koja su na 12. sjednici Predstavničkog doma Parlamentarne skupštine Bosne i Hercegovine, održanoj 27. oktobra 2011. godine, postavili poslanici Amir Fazlić i Darko Babalj.

Odgovor na poslaničko pitanje gosp. Amira Fazlića

Predstavničkom domu Parlamentarne skupštine Bosne i Hercegovine (PS BiH), 03. augusta 2011. godine, dostavljen je dopis g-đe Irine Lovrić u kojem se traži „profesionalna intervencija u sprječavanju korupcije i kriminala“.

Kolegij Predstavničkog doma PS BiH na 12. sjednici, održanoj 24. augusta 2011. godine, zaprimio je zahtjev gđe. Irine Lovrić za profesionalnu intervenciju. Tada je donešen zaključak da se zahtjev zajedno sa priložima dostavi Agenciji za prevenciju korupcije i koordinaciju borbe protiv korupcije, uz sugestiju, da Agencija u okviru svojih nadležnost preduzme odgovarajuće mjere.

Agencija je zahtjev zaprimila i izvršila uvid u sadržaj. Utvrdili smo da se radi o predmetu koji je ranije inicirala gđa. Lovrić, a koji se odnosi se na prijavu za, navodno, nezakonite radnje koje je počinio direktor Fonda za povratak BiH Mladen Božović. Takođe smo utvrdili da po predmetnom slučaju već postupa Tužilaštvo BiH (Akt Tužilaštva BiH broj A-86/10 od 25. marta 2010. godine).

Kako Agencija nema operativnih nadležnosti, u skladu sa članom 10. stav 1. tačka h), Zakona o Agenciji za prevenciju korupcije i koordinaciju borbe protiv korupcije, kompletan predmet sa priložima, 30. septembra 2011. godine, dostavljen je Tužilaštvu BiH na dalje nadležno postupanje.

Agencija je 19. oktobra 2011. godine uputila dopis gđi. Irini Lovrić u kojem smo je informirali o postupcima koje smo poduzeli u vezi sa njenim zahtjevom.

Odgovor na poslaničko pitanje gosp. Darka Babalja

Vijeće ministara Bosne i Hercegovine na 116. sjednici, održanoj 09. marta 2010. godine, donijelo je Odluku (broj 43/10) kojom je utvrđeno da je sjedište Agencije za prevenciju korupcije i koordinaciju borbe protiv korupcije u Istočnom Sarajevu.

Temeljem te odluke, Agencija je 6. septembra 2010. godine, upisana u Statistički registar prema djelatnosti, dok je aktom Porezne uprave Istočno Sarajevo (broj: 06/1.07/0801-053-20-115/10), od 13. septembra 2010. godine, registrirana u Poreznoj upravi Istočno Sarajevo.

U registar korisnika budžeta upisana je 14. septembra 2010. godine, u Ministarstvu financija i trezora BiH.

Zahvaljujući susretljivosti direktora Državne agencije za istrage i zaštitu (SIPA) Mirka Lujica, Agenciji za prevenciju korupcije i koordinaciju borbe protiv korupcije odobreno je privremeno korištenje tri kancelarije u zgradi SIPA-e, u ulici Nikole Tesle 59, u Istočnom Sarajevu. Agencija je privremeno, do pronalaska adekvatnih prostorija, smještena na ovoj adresi. Također, tu nam je odobreno i privremeno korištenje fiksnog broja telefona, koji se ujedno koristi i kao broj faksa (tel./fax 057/342-799) .

U toku 2010. godine, prema dokumentaciji koju smo zatekli, Agencija je potrošila 79.500,00 KM. Primopredaja dokumentacije Agencije između v.d. direktora Mije Krešića i imenovanog direktora Seada Lisaka, izvršena je 16. augusta 2011. godine. Nakon što je imenovano rukovodstvo preuzelo dužnost, pristupili smo reguliranju radno-pravnog statusa direktora i zamjenika direktora.

S obzirom na to da Ured za zakonodavstvo BiH nije dao pozitivno mišljenje na prijedlog Pravilnika o unutrašnjoj organizaciji Agencije, koji je predložio v. d. direktor, te da je i pored toga ovaj akt dostavljen Vijeću ministara BiH na saglasnost, zatražili smo da ovaj dokument bude povučen iz procedure.

Pristupili smo izradi novog Pravilnika, kao i Kodeksa ponašanja uposlenih u Agenciji, koji su upućeni nadležnim institucijama na mišljenje. Osim toga, rukovodstvo Agencije, otkako je imenovano, izradilo je nekoliko podzakonskih akata bez kojih ova institucija ne bi mogla funkcionirati i zakonito raditi. Takođe, izradili smo i Program rada Agencije za 2012. godinu.

Predstavnici Ureda za reviziju institucija BiH nedavno su izvršili i prethodnu reviziju u Agenciji, za što smo im osigurali svu raspoloživu dokumentaciju.

Paralelno sa ovim aktivnostima radili smo na osiguranju finansijskih sredstava za rad Agencije, te smo u dva navrata sačinjavali zahtjeve za prestrukturiranje budžeta za 2011. godinu. Poseban problem predstavlja nam i činjenica da je na snazi Odluka o privremenom finansiranju, te da je osnovica za odobravanje novčanih sredstava bila budžetska potrošnja Agencije iz 2010. godine. Osim toga, zbog Odluke o privremenom finansiranju nismo bili u mogućnosti nabaviti potrebna vozila, kancelarijski materijal, računare, kopir-aparat i drugu materijalno-tehničku opremu neophodnu za funkcioniranje Agencije.

S obzirom na to da je Vijeće ministara odlučilo da sjedište Agencije bude u Istočnom Sarajevu, pokušali smo pronaći i adekvatna prostor za smještaj Agencije. Obišli smo nekoliko objekata u kojima postoje prostori za izdavanje, te smo razgovarali sa ponuđačima prostora. Niti jedan ponuđeni prostor nije odgovarao našim potrebama, odnosno svaki od njih zahtijevao je dodatne građevinske radove. Takođe, vlasnici prostora tražili su i da bude sačinjen ugovor o zakupu u situaciji kada Agencija ima samo tri stalno zaposlena, i kada nema planiran novac za ovu namjenu u 2011. godini. Novac za zakup prostora planirana je tek 2012. godine, te je, teoretski gledano, tek od januara 2012. godine moguće ozbiljnije pregovarati sa zakupodavcima oko unajmljivanja prostora.

Osim toga, vrlo je teško opravdati zakup prostora u trenutku kada Agencija ima tek tri stalna zaposlenika (direktora i dva zamjenika). Kao što Vam je poznato, tek nakon usvajanja Pravilnika o unutrašnjoj organizaciji, koji smo u zakonom predviđenom roku izradili i uputili u proceduru, stvaraju se pretpostavke za zapošljavanje potrebnog osoblja Agencije.

U proteklom tromjesečnom period, otkako smo imenovani, održali smo više radnih sastanaka od kojih izdvajamo sastanke sa predstavnicima Ministarstva finansija i trezora BiH, Evropske komisije u BiH, Centralne izborne komisije, EUPM-a, ali i sa predsjednikom GRECO-a, nevladinim organizacijama, predstavnicima Ambasade SAD-a i Francuske u BiH, direktorom SIPA-e...

Zahvaljujući podršci EUPM-a, osigurali smo donaciju za izradu web-stranice Agencije koja će nam omogućiti da javnosti prezentiramo svoj rad, ali i osiguramo komunikaciju kako sa građanima, tako i sa vladinim i nevladinim institucijama. Putem donacije osigurali smo i tri računara, radili smo na medijskoj promociji Agencije (naši komentari i intervjui preneseni su u nekoliko printanih medija (Glas srpske, Nezavisne novine, glas Europe, BIRN, Dnevni Avaz, TV Hajat...), učestvovali smo na sastancima Monitoring tima za praćenje liberalizacije viznog režima za građane BiH u EU, kao i na seminarima i konferencijama koji su tretirali problematiku korupcije.

Agenciji su u periodu od 01. januara 2011. do 30. septembra 2011. godine odobrena sredstva u iznosu od 189.000,00 KM. Od iznosa odobrenih sredstava Agencija je utrošila 132.960,00 KM ili 70 posto u odnosu na plan. Novac je korišten kako bi bili osigurani minimalni uslovi za funkcioniranje Agencije.

I na koncu, do sada nismo imali priliku da procijenimo podršku Vijeća ministara Agenciji. Nadamo se da će davanje saglasnost na predloženi Pravilnik o unutrašnjoj organizaciji, koju očekujemo od Vijeća ministara BiH, biti prvi pokazatelj opredijeljenosti ministara da podrže naš i rad Agencije kojom rukovodimo.

Srdačno,

Dostavljeno:

- Naslovu
- a/a

